



Íslandshótel hf.  
Sigtúni 28  
105 Reykjavík

UMHVERFIS- OG  
AUÐLINDARÁÐUNEYTIÐ

Skuggasundi 1 101 Reykjavík  
sími: 545 8600 postur@uar.is  
umhverfisraduneyti.is

Reykjavík 17. desember 2021  
Tilv.: UMH21110084/8.13

Vísað er til bréfs Íslandshótela hf., kt. 630169-2919, dags. 26. nóvember sl., þar sem sótt er um tímabundna undanþágu til tveggja ára frá starfsleyfisskilyrðum, sbr. samræmd starfsleyfisskilyrði fyrir gististaði og hótél. Ráðuneytið metur það sem svo að sótt sé um undanþágu frá 1. mgr. 19. gr. reglugerðar nr. 941/2002 um hollustuhætti þar sem kveðið er á um að óheimilt sé að hleypa hundum, köttum eða öðrum dýrum inn í húsrými eða á lóðir sem fjallað er um í fylgiskjali 3 með reglugerðinni. Í fylgiskjali 3 er kveðið á um að óheimilt sé að hleypa hundum, köttum og öðrum gæludýrum inn á tiltekna staði þ. á m. gististaði í flokki II, III og IV samkvæmt lögum um veitingastaði, gististaði og skemmtanahald. Í erindinu kemur fram að sótt er um undanþágu fyrir átján hótél víðs vegar um land til þess að koma betur til móts við þá ferðamenn sem eiga hunda og kjósa að gista á hótélum fyrirtækisins. Tímabundin undanþága hafi verið veitt af umhverfis- og auðlindaráðuneytinu í júní 2020 og gildi til 1. október 2020 á sjö hótélum fyrirtækisins. Í framhaldi af því hafi undanþágan verið framlengd til 1. janúar 2022 fyrir öll 17 hótél Íslandshótela. Að mati Íslandshótela ehf. hafi það að leyfa hundum að gista með eigendum sínum reynst vel á öllum hótélum fyrirtækisins og verið án vandkvæða. Alls hafi hundar dvalið í um 610 gistinætur sem sýni að hundaeigendur hafi tekið þessari nýlundu fagnandi. Í ljósi fenginnar reynslu hafi Íslandshótel hf. áhuga á því að koma áfram til móts við ferðamenn sem kjósi að gista á hótélum keðjunnar, sem verði orðin átján talsins á næsta ári, með því að bjóða áfram gistingu þar sem hundar eru leyfðir. Herbergin fyrir hundaeigendur eru á jarðhæð á flestum hótélanna. Hægt verði að fara í öll herbergin án þess að koma nálægt veitingaaðstöðu og á sumum hótélunum sé sérinngangur fyrir hundaeigendur. Á heilbrigðiseftirlitssvæði Vesturlands sé sótt um undanþágu fyrir Fosshótel Hellnar 356 Snæfellsbæ. Á Fosshóteli Hellnum séu aðstæður þannig að hundar verði eingöngu leyfðir í herbergjum nr. 31, 32 og 33. Umrædd herbergi séu staðsett í sérhúsi en ekki í aðalbyggingunni þar sem veitingahúsið er, herbergin séu öll þriggja manna og því rúmgóð og með sérinngangi.

Samkvæmt 1. mgr. 41. gr. laga nr. 7/1998, um hollustuhætti og mengunarvarnir, er ráðherra heimilt þegar sérstaklega stendur á og að fenginni umsögn heilbrigðisnefndar eða Umhverfisstofnunar, að veita undanþágu frá einstökum greinum reglugerða settum samkvæmt lögum. Samkvæmt 3. ml. 1. mgr. 6. gr. laga nr. 7/1998 um hollustuhætti og mengunarvarnir er ráðherra heimilt, ef ríkar ástæður mæla með því og að fenginni umsögn Umhverfisstofnunar og eftir atvikum heilbrigðisnefndar, að veita tímabundna undanþágu frá kröfu um starfsleyfi.

Ráðuneytið sendi erindið til umsagnar Umhverfisstofnunar og Heilbrigðisnefndar Vesturlands þann 29. nóvember sl.

Í umsögn Umhverfisstofnunarinnar, dags 2. desember sl., kemur fram að sú þróun hafi átt sér stað undanfarin ár að gæludýrum hafi verið veitt aðgengi að því húsnæði sem fellur undir reglugerð nr. 941/2002 um hollustuhætti í auknum mæli, t.d. veitingastöðum og almenningssamgöngum, að uppfylltum ákveðnum ströngum skilyrðum. Í ljósi þeirrar þróunar og þeirra aðstæðna sem nú séu uppi í ferðaþjónustu vegna Covid-19 faraldursins og með tilliti til þeirra skilyrða sem Icelandair Hótel myndi setja fyrir því að leyfa aðgengi hunda að hótélunum mæli Umhverfisstofnun ekki gegn því að umbeðin undanþága verði veitt frá ákvæði 1. mgr. 19. gr. reglugerðar nr. 941/2002 um hollustuhætti að því gefnu að settum skilyrðum verði fullnægt án undantekninga.

Í umsögn Heilbrigðisnefndar Vesturlands, dags. 13. desember sl. kemur fram að nefndin geri ekki athugasemdir við að hundahald verði leyft á tilteknum gistihverbergjum sem vísað er til í erindi Íslandshótel hf.

Í ljósi framangreindra umsagna og sérstakra aðstæðna í þjóðfélaginu fellst ráðuneytið á samkvæmt 1. mgr. 41. gr. laga nr. 7/1998, um hollustuhætti og mengunarvarnir, sbr. og 74. gr. reglugerðar nr. 941/2002 um hollustuhætti og 4. ml. 1. mgr. 6. gr. laga nr. 7/1998 um hollustuhætti og mengunarvarnir, að veita Íslandshótelum hf. kt. 630169-2919 umbeðna undanþágu frá ákvæði 19. gr. reglugerðar nr. 941/2002 um hollustuhætti og undanþágu frá starfsleyfi hvað varðar það ákvæði að óheimilt sé að fara með hunda inn á gististaði í flokki II, III og IV, og heimila að farið verði með hunda inn á Fosshótel Hellnum í herbergi nr. 31, 32 og 33

Undanþága þessi er bundin eftirfarandi skilyrðum:

1. Ábyrgðamaður hunds skal vera 18 ára eða eldri og ber honum að tryggja að ekki sé farið með hunda nema á þau afmörkuðu svæði þar sem þeir eru sérstaklega leyfðir. Hver ábyrgðarmaður getur haft með sér einn hund til dvalar á gististaðnum og að hámarki séu ekki fleiri en tveir hunda í hverju herbergi.
2. Ábyrgðarmaður hunds ber ábyrgð á hreinlæti í tengslum við hundinn og ber að hreinsa upp eftir hann sé þörf á.
3. Ábyrgðarmaður hunds ber ábyrgð á að grípa til aðgerða sé þess þörf til að tryggja öryggi annarra gesta eða hunds.
4. Taka skal fram við bókun að hundur fylgi, þar sem sérstökum herbergjum er úthlutað.
5. Fara skal með hunda inn og út um sérinnganga og óheimilt er að fara með hunda inn á sameiginleg rými, þ.m.t. gestamóttöku.
6. Hundar skulu vera í búri inn á herbergi.
7. Hundar skulu ekki valda öðrum gestum ónæði.
8. Við inn- og útritun skal hundurinn bíða bundinn úti eða í bíl.
9. Þrifaáætlun skal vera í samræmi við að hundar dvelji á hluta hótelsins og að það sé tryggt að sérstaklega sé þrifið eftir dvöl hunda þar í hvert sinn.
10. Taka skal fram í markaðssetningu hótelsins, við bókun gistingar og á vefsíðu þess að hundar séu leyfðir í afmörkuðum hluta hótelsins, svo aðrir gestir geti tekið upplýsta ákvörðun áður en þeir panta gistingu á hótelinu.
11. Upplýsa skal aðra gesti hótelsins með sýnilegum hætti um að hundar séu leyfðir á afmörkuðum svæðum á hótelinu.
12. Upplýsa skal gesti með greinilegum hætti allt í fjórar vikur eftir að undanþágan fellur úr gildi um að hundur hafi verið í húsnæðinu og á tilteknu herbergi.
13. Ábyrgðarmaður hunds ber almenna ábyrgð á skaða og/eða eignatjóni sem hundur veldur. Íslandshótel hf. skal þó taka ábyrgð á skaða og/eða eignatjóni sem hundur sem dvelur á gististað kann að valda öðrum gestum á gististaðnum.

14. Fylgja skal þeim skilyrðum sem fram komu í bréfi Íslandshótels hf. til ráðuneytisins, dags. 26. nóvember sl.
15. Fara skal eftir samþykktum um hundahald í þeim sveitarfélögum sem gististaðirnir eru í.

Starfsemi Fosshótels Hellna er starfsleyfis skyld og háð eftirliti Heilbrigðisnefndar Vesturlands. Rekstraraðili skal sækja um breytingu á starfsleyfi til nefndarinnar vegna hunda á hótelinu á meðan undanþágan varir. Um umferð hunda í og við hótelin fer að öðru leyti samkvæmt ákvæðum 19. gr. reglugerðar nr. 941/2002 um hollustuhætti. Heilbrigðisnefnd Vesturlands skal birta undanþágu þessa á vefsíðu sinni sem og eftirlitsskýrslur fyrirtækja sem starfa á undanþágu.

Undanþága þessi gildir til 15. desember 2023 og er bundin því skilyrði að rekstraraðili tryggji öryggis- og hollustuháttareglur.

Framangreint tilkynnist hér með.

Fyrir hönd ráðherra

Sigurbjörg Sæmundsdóttir

Trausti Ágúst Hermannsson

Afrit:  
Umhverfisstofnun  
Heilbrigðisnefnd Vesturlands